


Tha tòrr mhaoraich nan itheadairean-sìolaidh m.e. bàirnich, feusgain agus srùbain. Tha sin a' ciallachadh gu bheil iad a' sìoladh am plancton às an t-sàl len giùrain. 'S e lus-itheadairean a th' ann am bàirnich agus faochagan oir tha iad a' sgrìobadh an àirde an fheamainn bheag a tha a' fàs air na creagan. Nuair a tha an tràigh ann tha na mhaoraich sin gan dùnadh fhèin nan slige no a' gabhail greim teann air na creagan. Le seo, chan eil iad a' tiormachadh an àirde 's chan eil beathaichean eile gan ithe.

### *maorach ag ithe*



'S e clàbaraichean a th' ann an crùbagan 's bithidh iad ag ithe rudan marbh a tha a' tuiteam gu grunn na mara.

Tha crosagan a' cleachdadh an gairdeanan làidir airson sligean fhosgladh agus tha a' chonachag a' cleachdadh a teanga mar eighe airson toll a dhèanamh ann an sligean. Bithidh leòbagan ag ithe mhaoraich bheaga agus bithidh clomhagan-chaothaich mhòr a' glacadh carrain bheaga. Tha iasg nas motha, mar rionnaich, an uair sin ag ithe an t-iasg seo. 'S e feòil-itheadairean a th' annta uile.

### *crosgag*



Tha feòil-itheadairean nas motha mar eòin grunnachaidh agus faoileagan ag ithe mhaoraich cuideachd. Tha guib bheaga air trilleachain beaga airson a bhith a' tionndadh chlathan airson partain agus carrain beaga a lorg. Tha fulmairean, faoileagan agus falcagan (facal a' ciallachadh falcaichean, eòin an sgadain agus buthaidean) ag ithe èisg bheaga. Tha sùlairean ag ithe an èisg as motha.

'S e an iolair' mhara am feòil-itheadair as motha th' ann agus bithidh i ag ithe èisg mhòra agus eòin mhara.

### *crùbag*



### *ìolair mhara*

Ⓒ Cleachd am fiosrachadh seo, agus rud sam bith eile a dh' ionnsaich thu air do chuairt chun a' chladaich airson lìon-bidhe a dhèanamh air duilleag mhòr pàipear. Tòisich leis an iolair' mhara aig a' mhullach. Cuir na feòil-itheadairean as motha ann an sreath dhà no trì loidhnichean fon sin. An uair sin feòil-itheadairean nas lugha, na lus-itheadairean fon sin agus faisg air a' bhonn am plancton. (Chan eil càil beò anns a' mhuir a tha cho pailt ris.) 'S dòcha gum b' fheàrr leat dealbh a dhèanamh no slige fhalamh a steigeadh air an àite sgrìobhadh. An uair sin dèan loidhne thiugh gu na rudan a tha gach creutair ag ithe.

